

## **Idiazabalen hileta eta omenaldi zibilak egiteko ordenantza.**

### ATARIKOA

Jakina denez, Estatu akonfesional eta laiko batean erakundeek bermatu behar dute pertsonen eta komunitateen askatasun ideologikoa, erlijiosoa eta gurtzekoa, muga honekin bakarrik: Ordena publikoa mantentzea legearen arabera. Era berean, ezaguna da zer nolako aniztasun ideologiko, erlijioso eta kulturala duen gure gizarteak. Hain zuzen ere, gizartea plurala da eta etenik gabe eraldatzen ari da, bere ohitura eta ekitaldi sozialei dagokienez.

Norbait hiltzean hileta eta omenaldi zibilak egitea behar sozial batetik sortu da: Ospakizun duin eta pertsonala eskaintzea erlijiorik gabe bizitzea aukeratu duten herritarrei, hildako pertsonak bizitzaz zuen ikuspegiarekin bat etorriz.

Gure gizartean erlijio desberdinak bizi dira elkarrekin eta gure herrian bertan toki edo tenpluak dauzkate, beren hildakoentzat ekitaldi liturgikoak antolatzen. Horren ildotik, Idiazabalgo Udalak erantzun egin behar dio geroz eta eske handiagoa duen behar sozial honi.

Ordenantza honekin, beraz, erregulatu nahi da hildakoei, omenaldi gisara edo agur modura, beren familiakoek, adiskideek, elkarrekin eta/edo entitateek –Idiazabalgo gizarte zibila osatzen dute denek-, persona horren ekarpen komunitarioak edo balore etikoak edo/eta humanoak aitortzeko, egin nahi dizkieten ekitaldiak gauzatzeko baimena.

### I. KAPITULUA

#### HASIERA

##### 1. Artikulua.

Ordenantza honen helburua da erregulatzea Idiazabalen hileta eta omenaldi zibilak egiteko lokal eta espazio publikoen erabilera eta hartarako baimena.

##### 2. Artikulua.

Alkateak edo berak izendatutako zinegotziak emango du baimena, 5.2 artikuluan finkatutako lokalak eta espazioak erabiltzeko, aldezturik Idiazabalgo Udaletxeko Erregistroan eskaera aurkeztuta.

### 3. Artikulua

Hileta eta omenaldi zibilak egiteko eskaerak Idiazabalgo Udaleko Alkatetzara zuzendu behar dira, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legeak aurreikusitako moduren batean.

### 4. Artikulua.

Hileta eta omenaldi zibilak egiteko eskaeren tramitazioa zirkunstantziek eskatzen duten arintasun printzipioen arabera egingo da eta eskumena duen pertsonarengana helaraziko dira hark erabakia hartzeko.

### 5. Artikulua.

Eskaerek honako datu hauek eduki behar dituzte:

- Ekitaldia ospatzeko bimena eskatzen duen pertsonaren izen-deiturak, helbidea eta identifikazioa.
- Hildako pertsonaren izen-diturak.
- Heriotza ziurtagiria.
- Hileta eta omenaldi zibila egiteko lehentasunezko eguna eta ordua. Udalak ahal duen neurrian aintzakotzat hartuko ditu eskatutako data eta ordua, beti ere eskaeren aurkezpen ordenari jarraituz. Aipatu ordena aldatu ahal izango da zirkunstantzia edo kasu berezietan, beti ere behar bezala arrazoituta.
- Ekitaldiaren gutxi gorabeherako iraupena.
- Eskaera lekua eta data.
- Eskatzailearen sinadura eta/edo bere borondatearen benetakotasunaren egiaztapena edozein baliabidez.
- Ekitaldiaren azalpen laburra eta erabiliko den materialarena (mahaiak, aulkiak, megafonía,...).

Oro har, ospakizun hauek hurrengo eraikin edo espazio publiko hauetan egingo dira:

- Pilarreneako ganbara.
- Udaletxe Areto Nagusia.
- Guraso Elkarteko aretoa.
- Goiko kalbarioko hilerri zaharreko plaza.
- Urtsuarango Plaza.

- Plaza Nagusia.
- Zelaako Kiroldedia.
- Igarondoko Pilotalekua.
- Txomenarenako Parkea.

#### 6. Artikulua.

Eskaerak ez baditu betetzen aurreko artikuluan ezarritako baldintzak, interesatuari errekerituko zaio ahalik eta lasterren, ekitaldia baino lehen edo ondoren, konpontzeko egindako hutsegitea edo aurkezteko eginduzko dokumentuak.

## II. KAPITULUA

### INSTRUKZIOA

#### 7. Artikulua.

Hileta edo omenaldi zibilaren ekitaldi eguna eta ordua alkateak edo berak ahalmendutako zinegotziak finkatuko ditu, hartarako irekitako espedientea aurretik dela.

Instrukzioa eskaeren aurkezte ordenari jarrituz egingo da eta eskatzaileek emandako lehentasun ordena ahal den guztian errespetatuz. Ordena hori aldatu ahal izango da aparteko eta premia larriko zirkunstantzia objetiboak gertatzen direnean. Edozein kasutan, aparteko eta premia larriko izaerak behar bezala arrazoituta egon behar du eta beren eskubidean aldaketa pairatu dutenei entzun egin beharko zaie.

#### 8. Artikulua.

Hileta eta omenaldi zibila zein lokaletan edo Udaletxeko zein espaziotan egingo den alkateak edo berak ahalmendutako zinegotziak erabakiko du. Oro har, 5. Artikuluan finkatuetakoa bat izango da. Aparteko egoeretan baimena eman ahal izango da beste lokal edo espazio publikoren bat erabiltzeko.

#### 9. Artikulua.

Hileta eta omenaldi zibilak edozein egunetan egin ahal izango dira, 9:00etatik 14:00etara eta 17:00etatik 20:00etara.

#### 10. Artikulua.

Erabiltzen diren udal baliabideen erabilera doakoa izango da.

#### 11. Artikulua

Hileta edo omenaldi zibilak dirauen bitartean Idiazabalgo Udaltzaingoa kanpoaldean egongo da, ekitaldia bidezko moduan gauzatuko dela bermatzeko.

### III. KAPITULUA

#### ESKUBIDEAK ETA BETEBEHARRAK

##### 12. Artikulua.

Kontserbazio egokia bermatzeko, baimena duen titularrak izango du erantzukizuna, ekitaldiarengatik udal ondasunetan gertatzen diren kalte eta galeren aurrean.

##### 13. Artikulua.

Hileta eta omenaldi zibilaren ekitaldia egingo den tokia modu berezian apaindu edo atondu nahi badute familiakoek eta/edo adiskideek, udal arduradunari garaiz jakinarazi behar diote, bidezko erabakiak har ditzan. Apaintze edo atontze lanek tokiaren harmonia eta ezaugarriak errespetatu behar dituzte eta sortzen dituen gastuak haien kargura izango dira. Ekitaldia gauzatzeko zerbitzu osagarriak pertsona interesdunak emango ditu eta bere kargura izango dira. Halere, Idiazabalgo Udalak haien gainbegiraketa egingo du.

Baimena duen titularrak izango du erantzukizuna, ekitaldiarengatik udal ondasunetan gertatzen diren kalte eta galeren aurrean.

##### 14. Artikulua.

Ordenantza honetan aurreikusten ez denaren aurrean, udal arduradunen aginduei jarraitu beharko zaie.

#### XEDAPEN GEHIGARRIA

Baimena ematen zaio Idiazabalgo Udaleko Alkatetzari, ordenantza hau aplikatzeko beharrezkoak diren jarduketak aurrera eramateko.

#### AZKEN XEDAPENA

Ordenantza hau, behin betiko testua Gipuzkoako Aldizkari Ofizialean argitaratu ondoren eta TJOLaren 65.2 artikuluan aurrikusitako epea igarotzen denean jarriko da indarrean.